

**Umiarsuarmik ilaasartaammik sinersortaammik Nanortalimmiit Upernavimmut angalasoqarsinnaasunngorlugu 2020-miit ataatsimik umiarsualiisoqaqqinnissaanik sulissuteqaqqullugit Naalakkersuisut peqqunneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortaq Aqqalu C. Jerimiassen, Atassut)

**Akissuteqaat**

(Ineqarnermut Attaveqaqatigiinnermullu Naalakkersuisoq)

**Aappassaaneerneqarnera**

Naalakkersuisut sinnerlugit Sanaartornermut Ataatsimiititaliaq siunnersuummik suliaqarnerminut atatillugu peqqissaarussilluni sulinera pillugu qutsavigerusuppara.

Naalakkersuisut nuannaarutigalugu maluginiarpaat, Ataatsimiititaliaq attaveqaqatigiinnerup ataatsimut takussutissiorneqarnissaa pillugu peqqissaarussilluni isumaliuteqarsimasoq.

Naalakkersuisut ataatsimiititaliatulli maluginiarpaat, umiarsuup sinersortaatiq ataatsimik ilaneqarnerani aningaasaqarnermut kingunerisassat aalajangiiffigisassat siunnersuummi naammattumik nassuiarneqarsimangitsut. Suliniutinik taamaattunik aallartitsinnginnitsinni nunatsinni angallannermi tamarmiusumi aningaasaliinermi ingerlatsinermilu aningaasaqarnermut kingunerisassanik misissuinissarput pingaaruteqarpoq. Tamatumani Naalakkersuisut assartuuseriaatitsinni aningaasaqarnermik tamarmiusumik appartitsiniarlutik sulinerat eqqarsaatigineqarpoq.

Taamaattumik Naalakkersuisut Ataatsimiititaliap attaveqaatinut pilersaarummik ataatsimoortumik suliaqarnissamut kaammattuuteqarnera, 2011-p kingorna ilisimasanik sulianullu annertuunut paasissutissanik katersuinissamut iluarisimaakkatsinnik kaammattuutigaarput. Taamaalilluta 2011-mi Assartuussineq pillugu Isumalioqatigiissitap isumaliutissiissuteqarnerata kingorna pisimasut eqqarsaatigalugit killiffiliisinnaalerpugut, aammalu siunissamut inassuteqaatissanik iluarsisinnaalerluta.

Kalaallit Nunaanni assartuussinerup pitsaanerulernissaa Naalakkersuisut ataatsimiititaliatulli kissaatigaat. Taamaattumik soorunami sinersortaammik angallassineq sukumiinerusumik misissuiffigeqqissaarusupparput. Tamatumali angallannerup sinneranut atanissaa pingaaruteqarpoq, taamaalilluta piffissaagallartillugu tamanut iluaqutaasumik aningaasaqarneq pilersaarusiorsinnaaniassagatsigu.

Sanaartornermut Ataatsimiititaliami ilaasortat siunnersuutip itigartinneqarnissaanik inassuteqaataat, Naalakkersuisuniit taparserparput. Taamatut oqaaseqarlunga siunnersuut Inatsisartuni kajumittumik suliaassanngorlugu tunniuppara.